

Ni Pangulong  
Henry B. Eyring

Unang Manuglaygay  
sa Unang Panguluhan



# Panagna kag Personal nga Bugna

**A**ng matuod nga Simbahan ni Jesucristo ginpanum-balik kag yari sa duta karon nga panahon. Ang Simbahan ni Jesucristo sang mga Santos sa Ulihing mga Adlaw humalin pa sadto ginapangunahan sang buhi nga mga propeta kag mga apostoles, nga nagabaton sing dalayon nga giya gikan sa langit.

Ang inang diosnon nga sulundan nangin matuod man sang una. Matun-an naton sa Biblia: "Sa pagkamatuod ang Ginuong Dios indi maghimo sing bisan ano nga butang, kon indi niya anay mapahayag ang iya tinago sa iya mga alagad nga mga manalagna" (Amos 3:7).

Ang Dios sa liwat naghambal sa aton panahon, paagi sa Propetang si Joseph Smith. Iya ginpahayag paagi sa Propetang si Joseph ang ebanghelyo ni Jesucristo sa iya sini kabug-usan. Iya ginpanumbalik ang Iya balaan nga priesthood upod ang mga yabi sini kag ang tanan nga mga kinamatarong, mga gahum, kag mga buluhaton sang sagrado nga gahum sang priesthood.

Sa aton panahon, ang buhi nga mga propeta kag mga apostoles awtorisado nga maghambal, magtudlo, kag maggiya nga may awtoridad gikan sa Dios nga Amay kag kay Ginuong Jesucristo. Ang Manluluwas nagsiling sa Propeta, "Kon ano ang ginhambal ko nga Ginuo, ginhambal ko, kag ginaobligar ko ang akon kaugalingon; kag bisan pa nga ang langit kag ang duta magataliwan, ang akon pulong indi magtaliwan, kundi nga ang tanan matuman, bisan sa akon kaugalingon nga tingug ukon paagi sa tingug sang akon mga alagad, pareho lamang ini" (D&C 1:38).

Sa pangkabiligan nga komperensya makaduha sa isa ka tuig, nabugayan kita sang oportunidad nga mabatian ang

pulong sang Ginuo para sa aton gikan sa Iya mga alagad. Isa ina ka prebilihiyo nga indi mabayran. Apang ang bili sinang oportunidad nagadepende kon batunon naton ang mga pulong sa idalom sang impluwensya sang amo man nga Espiritu sa diin ini ginhatac sa sinang mga alagad (tanawa sa D&C 50:19–22). Subong nga nagabaton sila sang giya gikan sa langit, kinahanglan kita amo man. Kag ina nagakinahanglan sa aton sang amo man nga espirtuhanon nga paghimud-os.

## "Himoa ang Imo Ulobrahon"

Sang nagligad nga mga tinuig isa sang mga miyembro sang Korum sang Napulo'g Duha ka mga Apostoles nagpangabay sa akon nga basahon ang isa ka pamulong-pulong nga iya ginahanda para sa pangkabiligan nga komperensya. Isa ako sadto ka bag-uhan nga miyembro sang korum. Nalipay ako sa iya pagsalig nga ayhan makabulig ako sa iya sa pagpangita sang mga pulong nga luyag sang Ginuo nga iya ipamulong. Nagsiling sia sa akon nga nagayuhum, "O, ika-22 na ini nga draft."

Nadumduman ko ang laygay sang isa ka mapinalang-gaon kag mabuot nga si Pangulong Harold B. Lee (1899–1973) nga ginhatac sa akon sadto nga may dako nga pagdagmit: "Hal, kon gusto mo makabaton sang bugna, himoa ang imo ulobrahon."

Nagbasa ako, nagbinagbinag kag nagpangamuyo para sa sinang ika-22 nga draft. Nagtuon ako sa tanan ko nga masarangan sa idalom sang impluwensya sang Balaan nga Espiritu. Sa tion nga ginhatac sinang miyembro sang korum ang iya pamulong, nahimo ko na ang akon

ulubrahon. Indi ako sigurado kon nakabulig ako, pero nakahibalo ako nga napabag-o ako sang nabatian ko ang ginhatag nga pamulong. Ang mga mensahe nag-abot sa akon nga labaw pa sa mga pulong nga akon nabasa kag nga iya ginpamulong. Ang mga pulong may mas dako nga kahulugan sangsa sadtong akon nabasa sa draft. Kag ang mensahe daw para gid sa akon, bagay gid sa akon mga kinahanglanon.

Ang mga alagad sang Dios nagapuasa kag nagapanngamuyo nga mabaton ang mensahe Niya para sa ila nga ihatag sa sinang nagakinahanglan sang bugna kag inspirasyon. Ang akon natun-an sa sinang eksperiensia, kag madamo pa nga iban kasubong sina, amo nga agud mabaton ang dalagko nga mga benepisyos nga sarang maagom gikan sa pagpamati sa buhi nga mga propeta kag mga apostoles, kinahanglan naton mismo magbayad sang bili sang pagbaton sang bugna.

Palangga sang Ginuo ang tagsa ka tawo nga ayhan magpamati sa Iya mensahe, kag Iya nahibaloan ang mga tagipusuon kag mga sirkumstansya sang kada isa. Nakahibalo Sia kon ano nga pagpatadlong, ano nga pagpaisog, kag kon ano nga kamatuoran sang ebanghelyo ang pinakamaayo nga makbulig sa tagsa ka tawo nga magpili sang iya alagyan sa banas padulong sa kabuhi nga wala'y katapusan.

Kita nga nagapamati kag nagalantaw sa mga mensahe sa pangkabiligan nga komperensya kon kaisa nagahuna-huna pagkatapos, "Ano ang madumduman ko sing pinaka-maayo?" Ang ginalauman sang Ginuo para sa tagsa sa aton amo nga ang aton sabat mangin: "Indi ko gid malipatan ang mga tinion sang akon mabatyagan ang tingug sang Espiritu sa akon hunahuna kag tagipusuon nga nagasiling sa akon kon ano ang akon mahimo agud mapalipay ang akon Amay nga Langitnon kag ang Manluluwas."

Sarang naton mabaton inang personal nga bugna kon magpamati kita sa mga propeta kag mga apostoles kag kon magtinguha kita sa pagtuo nga mabaton ini, subong nga si Pangulong Lee nagsiling nga sarang naton ini mabaton. Nakahibalo ako nga matuod ina gikan sa eksperiensiya kag sa saksi sang Espiritu.

## PAGTUDLO GIKAN SA SINING MENSAHE

Binagbinaga ang pagbasa sing mabaskog sang istorya ni Pangulong Eyring parte sa pagtuon sang draft sang pangkomperensya nga pamulong sang miyembro sang iya korum. Ayhan mamangkot kamo, "Ano ang bili sa pagbaton sang bugna?" Pagkatapos sang inyo

paghinambalanay, sarang ninyo agdahan inang inyo ginabisita sa pagbinagbinag kag pag-implementar sang isa ka plano sa pagbaton sang mga mensahe sa ginap-abot nga pangkabiligan nga komperensya "sa idalom sang impluwensya sang amo man nga Espiritu sa diin ang ini ginhatag sa mga alagad sang [Dios]."

## LAMHARON

### Ang Amay nga Langitnon Naghambal sa Akon paagi sa Pangkomperensya nga Pamulong

Ni Anne Laleska Alves de Souza

**N**agaduhaduha ako sadto kon ano ang akon kuhaon nga kurso sa unibersidad. Kalabanan sa mga tawo wala sang maayo nga itugda parte sa kurso nga luyag ko kuhaon, gani nagpangamuyo ako sa Ginuo agud tan-awon kon nagaugyon Sia sa akon desisyon.

Ang sabat sa akon nag-abot sa masunod nga adlaw samtgang nagabasa ako sang pamulong sa isa ka pangkabiligan nga komperensya sa *Liahona*. Nabatyagan ko nga daw ang Amay nga Langitnon nagahambal sa akon nga indi Sia makapili para sa akon—ini isa ka desisyon nga kinahanglan ko himuong sa akon kaugalingon. Nakahibalo ako nga bisan ano pa ang akon pilion, kinahanglan ko gid magtinguha agud mangin madinalag-on.

Nakahibalo ako nga ginsabat ang akon pangamuyo. Ang kompirmasyon sang Balaan nga Espiritu nagbulig sa akon sa paghimo sang desisyon. Natun-an ko ang paghatag sang akon bug-os nga pagtinguha kag nakahibalo nga ang Amay nga Langitnon magabulig sa akon.

*Ang tagsulat nagaistar sa Sergipe, Brazil.*

## MGA KABATAAN

### Sundon ang Propeta

**A**ng mga propeta kag mga apostoles nagapamulong para sa Amay nga Langitnon kag kay Jesucristo. Ginatudloan nila kita kon paano sundon si Jesus. Ano ang pila ka mga butang nga ginapangabay sang propeta kag mga apostoles nga aton nga himuong?

© 2016 iya sang Intellectual Reserve, Inc. Tanan nga mga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/15. Pagtugot sa paglubad: 6/15. Paglubad sang *First Presidency Message, April 2016*. Hiligaynon. 12864 861



# Mga Anak nga Babayi sang Aton Wala'y Katapusan nga Amay

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano ang paghangop sang “Ang Panimalay: Isa ka Proklamasyon sa Kalibutan” makapadugang sang inyo pagtuo sa Dios kag magabugay sa ila nga inyo ginabantayan paagi sa visiting teaching? Para sa dugang nga impormasyon maglog-on sa [reliefsociety.lds.org](http://reliefsociety.lds.org).

**A**ng balaan nga mga kasulatan nagatudlo sa aton nga “kita ang kaliwat sang Dios” (Mga Binuhatan 17:29). Ang Dios nagtumod kay Emma Smith, asawa sang Propetang si Joseph Smith, bilang “akon anak nga babayi” (D&C 25:1). Ang proklamasyon sa panimalay nagatudlo sa aton nga ang tagsa sa aton “isa ka pinalangga nga espiritu . . . nga anak nga babayi sang langitnon nga mga ginikanan.”<sup>1</sup>

“Sa ginharian antes sa duta, natun-an naton ang parte sa aton wala'y katapusan nga pagkatawo bilang mga babayi,” siling ni Carole M. Stephens, unang manuglaygay sa pangkabiligan nga panguluhan sang Relief Society.

“Ang aton mortal nga pagpanglakton sa duta wala nagliwat sinang mga kamatuoran.”<sup>2</sup>

“Ang inyo Amay sa Langit naka-hibalo sang inyo ngalan kag naka-hibalo sang inyo sirkumstansya,” siling ni Elder Jeffrey R. Holland sang Korum sang Napulo’g Duha ka mga Apostoles. “Mabatian Niya ang inyo mga pangamuyo. Nakahibalo Sia sang inyo mga paglaum kag mga handum, lakip na ang inyo mga kahadlok kag mga kapaslawan.”<sup>3</sup>

“Kita kada isa kabahin sang kag kinahanglanon sa panimalay sang Dios,” siling ni Sister Stephens. “Ang dutan-on nga mga pamilya tanan nagkalainlain. Kag samtang ginahimo

naton ang tanan sang aton masarangan agud maghimo sing mabaskog nga tradisyunal nga mga pamilya, ang pagkamiyembro sa pamilya sang Dios wala nagadepende sa bisan ano nga klase sang estado—estado sa kasal, estado sa pagkaginikanan, estado sa kuwarta, estado sa sosyedad, ukon bisan ang klase sang estado nga aton ginabutang sa social media.”<sup>4</sup>

## Dugang nga Balaan nga mga Kasulatan

Jeremias 1:5; Mga Taga-Roma 8:16; Doctrine and Covenants 76:23–24

## Gikan sa Aton Kasaysayan

Sa iya sugilanong parte sa Unang Panan-awon,<sup>5</sup> ang Propetang si Joseph Smith nagapamatuo sang madamo nga mga kamatuoran—kalakip nga ang aton Amay nga Langitnon nakahibalo sang aton ngalan.

Ang lamharon nga si Joseph naghimud-os sa paghibalo kon diin nga simbahan mabuylog kag nakakita sang giya sa Santiago 1:5. Si Joseph nagpamat-od nga iya pamangkuton ang Dios.

Isa ka aga sang tigpamulak sang 1820, nagkadto sia sa mga kakahuyan agud magpangamuyo apang sa gilayon nalikupan sang madulom nga gahum. Sa sini iya ginsulat:

“Nakita ko ang isa ka haligi sang kasanag nga halin gid nayon sa

ibabaw sang akon ulohan, nga ang kasilaw labaw pa sa adlaw, nga nagamat-amat paidalom tubtob nga ini nagtupa sa akon.

“Wala madugay sang magtuhaw ini, natalupangdan ko ang akon kaugalingon nga naluwas gikan sa kaaway nga naggapos sa akon. Sang magtupa sa akon ang kasanag, nakakita ako sang duha ka mga Tinuga, nga ang kasilaw kag himaya indi masaysay, nga nagatin-dog sa hangin sa ibabaw ko nayon. Ang isa sa ila naghambal sa akon, nga ginatawag ako sa akon ngalan kag nagsiling, nga nagatudlo sa isa—*Ini ang Akon Hinigugma nga Anak. Pamatii Sia!*” (Joseph Smith—History 1:16–17).

## MGA TANDA

1. “Ang Panimalay: Isa ka Proklamasyon sa Kalibutan,” *Liahona*, Nob. 2010, 129.
2. Carole M. Stephens, “The Family Is of God,” *Liahona*, Mayo 2015, 11.
3. Jeffrey R. Holland, “To Young Women,” *Liahona*, Nob. 2005, 28.
4. Carole M. Stephens, “The Family Is of God,” 11.
5. Tan-awa sa Gospel Topics, “First Vision Accounts,” [topics.lds.org](http://topics.lds.org).

## Binagbinaga Ini

Paano ang pagkahibalo nga ikaw isa ka anak nga babayi sang Dios makaapekto sang imo mga desisyon?